

ZAKON

***O OSNIVANJU ZAVODA ZA IZVRŠENJE KRIVIČNIH
SANKCIJA, PRITVORA I DRUGIH MJERA***

BOSNE I HERCEGOVINE

I. POGLAVLJE OPĆE ODREDBE

Član 1.

(Osnivanje)

Ovim Zakonom osniva se Zavod za izvršenje krivičnih sankcija, pritvora i drugih mjera koje izrekne Sud Bosne i Hercegovine (u daljnjem tekstu: Zavod), određuje sjedište Zavoda, reguliraju odredbe o izgradnji namjenskog objekta u kojem će Zavod biti smješten.

Član 2.

(Sjedište)

Sjedište Zavoda je u gradu Istočno Sarajevo, općina Istočna Ilidža.

Član 3.

(Svrha osnivanja)

U Zavodu se izvršavaju krivične sankcije, pritvor i druge mjere Suda Bosne i Hercegovine, u skladu sa Zakonom Bosne i Hercegovine o izvršenju krivičnih sankcija, pritvora i drugih mjera ("Službeni glasnik BiH", br. 13/05 i 97/07) (u daljnjem tekstu: Zakon).

Član 4.

(Status Zavoda)

(1) Zavod je upravna organizacija u sastavu Ministarstva pravde Bosne i Hercegovine (u daljnjem tekstu: Ministarstvo pravde).

(2) Nadzor nad radom Zavoda vrši Ministarstvo pravde u skladu s posebnim propisima. Propise iz ovog stava donosi ministar pravde Bosne i Hercegovine (u daljnjem tekstu: ministar pravde).

II. POGLAVLJE IZGRADNJA ZAVODA

Član 5.

(Izgradnja objekta Zavoda i osiguranje sredstava)

(1) Zavod će biti izgrađen na utvrđenoj lokaciji u općini Istočna Ilidža.

(2) Sredstva za izgradnju Zavoda osiguravaju se prvenstveno iz donacija, te u budžetu institucija Bosne i Hercegovine i međunarodnih obaveza Bosne i Hercegovine, kao i iz drugih sredstava.

(3) Ministarstvo pravde i Ministarstvo finansija i trezora Bosne i Hercegovine vodit će aktivnosti usmjerene na osiguranje sredstava za izgradnju Zavoda.

Član 6.

(Status i organi Zavoda u izgradnji)

- (1) Zavod u izgradnji je privremena unutrašnja organizaciona jedinica Ministarstva pravde, sa specifičnostima organizacije utvrđenim ovim Zakonom.
- (2) Organi za izgradnju specijaliziranog objekta u kojem će se izvršavati krivične sankcije, pritvor i druge mjere su: direktor, Upravni odbor i Nadzorni odbor.

Član 7.

(Direktor Zavoda u izgradnji)

- (1) Zavodom za izvršenje krivičnih sankcija, pritvora i drugih mjera u izgradnji (u daljnjem tekstu: Zavod u izgradnji) rukovodi direktor imenovan u rang sekretara s posebnim zadatkom.
- (2) Direktor Zavoda u izgradnji odgovoran je za sva administrativna, tehnička, organizaciona i finansijska pitanja izgradnje objekta.
- (3) Direktor Zavoda u izgradnji podnosi izvještaj o radu Ministarstvu pravde, Upravnom odboru Zavoda u izgradnji i Nadzornom odboru Zavoda u izgradnji.

Član 8.

(Upravni odbor Zavoda u izgradnji)

- (1) Upravni odbor Zavoda u izgradnji (u daljnjem tekstu: Upravni odbor) ima pet članova i imenuje ga Vijeće ministara Bosne i Hercegovine (u daljnjem tekstu: Vijeće ministara), na prijedlog Ministarstva pravde bez raspisivanja javnog oglasa.
- (2) U svom prijedlogu Ministarstvo pravde osigurati će po jednog predstavnika predloženog od entitetskih ministarstava pravde.
- (3) Imenovanje se vrši do zaključenja investicije, a najduže do tri godine.
- (4) Upravni odbor nadležan je za:
 - a) donošenje odluka vezanih za utvrđivanje projektnog zadatka, izradu i verifikaciju projekta, odnosno izvedbenog projekta;
 - b) odobrenje svih pojedinačnih izvedbenih projekata kompleksa izgradnje;
 - c) provođenje procedura javnih nabavki;
 - d) osigurava, na prijedlog direktora, provođenje nadzora nad izvođenjem radova; usvajanje tromjesečnih izvještaja o radu direktora Zavoda u izgradnji, praćenje dinamike izvođenja radova;
 - e) Upravni odbor usvaja poslovnik o radu i odgovoran je za ukupno stanje investicije.

Član 9.

(Nadzorni odbor Zavoda u izgradnji)

- (1) Nadzorni odbor Zavoda u izgradnji (u daljnjem tekstu: Nadzorni odbor) ima tri člana, imenuje ga Vijeće ministara, na prijedlog Ministarstva pravde, bez raspisivanja javnog oglasa.

- (2) U svom prijedlogu Ministarstvo pravde osigurat će po jednog predstavnika predloženog od entitetskih ministarstava pravde.
- (3) Imenovanje Nadzornog odbora vrši se do zaključenja investicije, a najduže na period od tri godine.
- (4) Nadzorni odbor nadležan je za kontrolu finansijskih poslova Zavoda u izgradnji.
- (5) Na prijedlog Nadzornog odbora, ministar pravde može suspendirati, do konačne odluke Vijeća ministara, pojedine članove Upravnog odbora ili direktora Zavoda u izgradnji. Protiv odluke o suspenziji ne može se izjaviti žalba niti voditi upravni spor.
- (6) Nadzorni odbor, najmanje jednom u šest mjeseci, podnosi Ministarstvu pravde izvještaj o izvršenoj kontroli poslovanja Zavoda u izgradnji.

Član 10.

(Naknade)

- (1) Naknade za rad Upravnog i Nadzornog odbora, naknada za plaću direktora, te drugom angažiranom osoblju idu na teret Ministarstva pravde.
- (2) Visina naknade za rad Upravnog i Nadzornog odbora, te direktora Zavoda u izgradnji utvrđuje se odlukom koju, na prijedlog ministra pravde, donosi Vijeće ministara.
- (3) Članovi Upravnog i Nadzornog odbora ne ostvaruju prava iz radnog odnosa u Ministarstvu pravde.

Član 11.

(Donošenje propisa s ciljem realizacije investicije)

Ministar pravde može svojim aktom regulirati pitanja koja nisu regulirana ovim Zakonom, a za koja ocijeni da je neophodno donijeti s ciljem realizacije investicije koja se odnosi na izgradnju Zavoda.

Član 12.

(Završi račun)

- (1) Vijeće ministara usvaja godišnji obračun finansiranja Zavoda u izgradnji, najkasnije 45 dana nakon isteka kalendarske godine.
- (2) Vijeće ministara posebnom odlukom utvrđuje završni obračun finansiranja Zavoda u izgradnji.
- (3) Godišnji obračun i završni obračun prilažu se kao aneks uz godišnji izvještaj o izvršenju budžeta Ministarstva pravde.

III. POGLAVLJE PRIJELAZNE I ZAVRŠNE ODREDBE

Član 13.

(Početak rada Zavoda)

Odlukom Vijeća ministara utvrđuje se datum početka rada Zavoda kao upravne organizacije u sastavu Ministarstva pravde, kao i rok za imenovanje upravnika Zavoda.

Član 14.

(Završna odredba)

Ovaj Zakon stupa na snagu osmog dana od dana objavljivanja u "Službenom glasniku BiH".